

5. श्री रामकृष्ण तुं विजय कृष्ण गोस्वामी

ब्रसवार, 14 डेसम्बर 1882

दखिनीश्वर कॉली मन्दरस मंज छि भगवान श्री रामकृष्ण दीवुन दर्शुन करनुं बापथ श्रीयुत विजय कृष्ण गोस्वामी आमुंत्य। तिमन सूंत्य छि त्रे चोर ब्राह्म भक्त ति। श्री रामकृष्ण सुंदिस परमुं भक्त बलराम बाबू हस सूंत्य छि यिम लूख कलकत्ता प्यठुं नावि क्यथ आमुंत्य। श्री रामकृष्ण छि दुपहरस हना आराम करान।

श्री रामकृष्ण छि पननिस तखतस प्यठ बिहिथ। विजय, बलराम, मास्टर तुं बेयि भक्त छि तिमन कुन बुथ कॅरिथ पछुम पासुं बिहिथ। कांह छु वगविस प्यठ तुं कांह फर्शस प्यठुंय बिहिथ। कमरुंकि पछुंमि पासुं दरवाजुं किन्य छि गंगा जी बोजनुं यिवान। शीतुकाल छु, इसलिए छि साँरी गरूम पलव लाँगिथ। विजयस छु यँड दादि किन्य स्यठाह तकलीफ सपदान, अर्वुकिन्य छे तिमव पानस सूंत्य दवा बोटल अँन्यमुँच - दवा ख्यनुक वख वातनुं विजि ख्यन दवा।

वुन्यक्यनस छि विजय साधारण ब्रह्म समाजस मंज आचार्य सुंज नोकरी करान। तिमन छु समाजिकिस स्टेजस प्यठ बिहिथ वोंपदीश प्यवान करुन। मगर अजकल छे समाजस सूंत्य वार्याहन कथन प्यठ तिमन हना अलग राय। क्याह कॅर्यजि - नोकरी छि करान। अर्वुकिन्य छिनुं पनुंनि मरजी सूंत्य केह ह्यकान वॅनिथ, तुं न ह्यकान कॅरिथुंय। विजय छु अँकिस थदिस तुं श्रुचिस क्वलस (खानदानस) मंज जामुत। भगवान श्री चैतन्य देव सुंज अख जिठ्य चाठ अद्वैत गोस्वामी आँस्य ज्ञानी विजय छु यिहिन्दिद कोलुक सन्तान। निराकार परम ब्रह्म सुंदिस ध्यानस मंज आँस्य लीन रोजान, मगर सूंतिय छे तिमव भक्ति हुंज ति थँज अवस्था हॉवमुँच। तिम आँस्य दयि लोलस मंज मँत्य

सपदिथ नचान - यीत्य आँस्य पनुन पान मँशरिथ गछान जि नचान-नचान आसिख पलव तान्य वँस्य प्यवान। विजय ति छि ब्रह्म समाजस मंज आमुंत्य, निराकार परम ब्रह्म सुंद ध्यान छि करान; मगर पनुंनिस जद अद्वैत गोस्वामी सुंद श्रुच रथ (खून) छु तिहिंदिस शरीरस मंज दोरू करान। हृदयस मंज छुस दयि लोलुक ब्योल प्रोखुट सपदनस कुन वोतमुत, सिरिफ छु वखतस प्रारान। अर्वुकिन्य छि तिम भगवान श्री रामकृष्ण सुंज जांह नुं वुछमुँच दयि लोलुकि मचरूच अवस्था वुछिथ मूहित गाँमुंत्य। माँथुर पॅरिथ सरूफ यिथुं पाँठ्य सोरफुं वॉलिस ब्रोंहकनि फन वॉहरिथ बिहिथ आसान छु, तिथय पाँठ्य छु विजय ति श्री रामकृष्ण सुंदि रूति आँसुं मंजु द्रामुंत्य दयि सुंज प्रसंगन (कथन) बूजिथ मुहिथ सपदिथ तिमन निश बिहिथ आसान। पतुं येँलि तिमन दयि लोलस मंज शुर्यन हुंज पाँठ्य नचनि लगान। त्येलि छु विजय ति तिमन सूंत्य नचनि लगान।

अखलडकुं विष्णु ओस 'अरियदह' रोजान। तँम्य वॉज हटि तलुं श्राख तुं कॅरुं खोंदकुशी। अज छि तँम्य सुंजुंय कथ चलान।

श्री रामकृष्ण—वुछिव तँम्य लँडकन कॅर आतुं हत्या (खुदकुशी), येँनुं यि बूज, मन सपुद दोखी। योंत ओस यिवान, स्कूलस मंज ओस परान, मगर ओस वनान। समसार छुनुं जान लगान। पछुम ओस गोमुत। कस तान्य पननिस निश ओस केंचन दोहन रूजिथ। तति ओस बियाबानस (जंगलस) मंज, माँदानस मंज, पहाडस प्यठ बिहिथ हमेशि ध्यान करान। तँम्य ओस म्ये वोंनमुत, पताह छुम नुं ईश्वर सुंज कूत्याहन रूँपन हुंद दर्शुन छुस करान।

बासान छु यि ओसुस आँखरी जनुंम। पँतिमि जनमुं आस्यन वार्याह कामि कॅरिथ छुंनिमचुं। केह ओसुस बाकुंय रूदमुत, ति छु बासान यथ जन्मस मंज गोस पूरुं।

अँक्य भक्तन वोंन—“आत्म हत्या बूजिथ छु खोचुन यिवान।”

श्री रामकृष्ण—आत्म हत्या करुंय छु महापाप, फीरिथ कॅरिथ छु प्यवान बेयि समसारस मंज युन, तुं सुय समसारुक दोख प्यवान बूगुन।

“मगर योंदवय कांह ईश्वर-दर्शुन कॅरिथ शरीर त्रावि, तुं तथ छिनुं आत्म-हत्या वनान। तमि तरीकुं शरीर त्रावनस छुनुं दूश। ज्ञान प्राँविथ छु कांह कांह शरीर त्रावान। येँलि म्ये 'चि' हुंदिस सांचस मंज छि सोनुं सुंज मूरथ गॅरिथ तयार सपदान, तवुं पतुं कांह थँव्यतन या फुटराँव्यतन सु सांचि।

वार्याह वॅरियि सपुँद्य, वराह नगरुँ प्यटुँ ओस अख लॅडकुँ यिवान, वुमुँर आसिहेस योहंय वुह वॅरियि हिश। नाव ओसुस गोपाल सेन। यैलि तोर ओस यिवान त्यैलि ओस तस यूत भाव सपदान जि हृदयस ओस प्यवान सु रॅटिथ थवुन युथ नुँ वॅस्य प्येयि तुँ अथुँखोरं फुटनस।

“तॅम्य लॅडकन वोन अकि दोहुँ यकदम म्यान्यन खोरंन प्यठ अथुँ थॅविथ, ‘बुँ ह्यकुँ नुँ वोन्य बेयि यिथ-वोन्य द्रास बुँ।’ केंचि काल्य बूज्ज जि तॅम्य छु शरीर त्रोवमुत।”

“बद्ध जीवन्—समसारी जीवन् छुनुँ कुनि ति पॉठ्य होश आसान। कृताह दोंख छि प्रावान, कोताह दोखुँ छि ख्यवान, कूत्याह मुसीबतुँ छि चालान, तमि पतु ति छख नुँ बोदं ठिकानस प्यठ यिवान।

“ऊंट छु कॅड्यदार गासुँ बडुँ चावुँ सान ख्यवान। मगर यूत ख्यवान छु त्युतुय छुस दर दर करान आँसुँ किन्य रथ वसान, तोति छुनुँ कॅड्य गासुँ ख्योन त्रावान! समसौर्य मनशन छु यूत दोंख तुँ तकलीफ मेलान, अमापोंज केंह दोहं गॅछिथ छि सोरुय केंह मॅशरावान। जनानुँ मोयंस या बदचलन द्रायस, तुँ ब्याख नेथुरं छु करान।

शुर मूद, कोताह दोंख म्यूल, मगर केंचुँनुय दोहंन मंज्ज छुस सोरुय केंह मॅशिथ गछान। शुर्य सुंज्ज सोयं मॉज योसु दोखुँ मारु आँस बे सबुरं सपदान, छे' केंह दोहं गुजरनस प्यठ मस पारान, लटुर गंडान तुँ गॅहनव सूँत्य सजावन। यिथय पॉठ्य मोहंन्युव छु कोरि हूँदिस खान्दरस प्यठ सॉरुय दौलत हॉरिथ बेहान, मगर प्रथ वॅरियि कोरि ज्यँवरावनस मंज्ज छुनुँ कमी करान! मुकदिमुँ बॉज्जी मंज्ज छस नुँ खँड हार ति रोज्ञान अमापोंज तोति छु मुकदिमुँ बापथ दलुँ-बलुँ पकान। यीत्य शुर्य गॉस पाँदुँ, जान ख्यन, जान पलव, जान गरुँ छुनुँ तिमनुँय ओत मेलान, प्यटुँ प्रथ वॅरिथि बेयि ब्याख पाँदुँ गछान।

कुनि कुनि छि ‘सांप-छळुँदर’ हिश हालत गछान। न न्यंगलिथ ह्यकान, न द्रोंख अँनिथ ह्यकान। बद्ध जीव कुनि विज्जि गव समजिथ ति जि समसारस मंज्ज छुनुँ किंही, सिरिफ छि आँठ ल्यवुँन्य, तोति छुनुँ सु ह्यकान तथ त्राँविथ, ईश्वरस कुन छुनुँ मन ह्यकान निथ।

“केशव सेन सुन्द वुछुम अख पुनन नफर, वाँसि आसिहे योहंय पंचाह वुहुर, मगर ओस तास गिंदान। जन तुँ दयि नाव ह्यनुक समय छुनुँ आमुत।

“बद्ध जीवुँ सुंद छु ब्याख अख लख्यन। अगर सु समसारस निश हटॉविथ कुनि जायि प्यठ नियून, तुँ सु मरि छोरेँ छोरेँ करान। गॅसुँ क्येमिस छुँ गुँसुँमुय मंज्ज आनन्द मेलान। तमी सूँत्य छु सु हेँश्ट-पोँश्ट (पूठ) गछान। सु क्योम अगर बतुँ ल्यजि मंज्ज थँव्यून तुँ सु मरि।” (सॉरी गॅय रुज्जिथ)।

विजय—बद्ध जीवन् किछ गछि अवस्था आसुँन्य जि मुक्ती ह्येक्यख सपदिथ?

श्री रामकृष्ण—दयि सुंज्जि कृपायि किन्य तेज्ज वॉराग सपदुँनस प्यठ ह्यकि येमि कामिनी तुँ कांचन (जॅन्य तुँ द्यार) निशि लगावुँ प्यटुँ थोद वॅथिथ। ज्ञानान छुखुँ तीव्र (सँनिथ गछवुन) वॉराग कथ छि वनान? ‘बनत बनत बनि जाई’ (बनान बनान बनि), ‘चलो राम भजो’ (पख राम सुंद भजन कर), यि सोरुय छु मन्द वॉराग। यस तेज्ज (सँनिथ गोमुत) वॉराग छु आसान, तसुँन्द्य प्राण छि दयि सुँदि बापथ व्याकोल रोज्ञान। यस तेज्ज वॉराग छु आसान सु छु भगवानस त्राँविथ बेयि केंह नुँ यछान। समसारस छु सु क्रूर ज्ञानान, तस छु बासान जि वोन्य फोटुस। पनन्यन छु सु कालुँ सोरुफ वुछान, तिमन निशि चलुनुँच छस नुँ मरज्जी ति गछान तुँ चलान ति छु। ‘गरिच कॉम म्वकलाव तुँ पतुँ करव दयि सुंज्ज फिकर यि छुनुँ तसुँदिस मनस मंज्ज यिवानुँय। अंदरुँ छुस बडुँ जिद रोज्ञान।

“तेज्ज वॉराग कथ छि वनान, अमिच बूज्जि अख कथ। कति ताम मुलकस मंज्ज प्यव कम रूद। गूँस्य आँस्य नालि चॅट्य चॅट्य दूरि प्यटुँ पोन्थ अनान। अख गूस ओस बडुँ हठी। तॅम्य कोर अकि दोहुँ कसम जि योत तान्य नुँ पोन्थ हेँयि युन, नॅहर तुँ नॉल्य रलि बुँ रोज्जुँ खनान। यपॉर्य वोत श्रान करनुक समय (वखुँत)। तसुँज्जि कोलियि सूज्ज तस वननुँ बापथ कूर। कोरि वोन, पिताजी, दुपहर वोत, पॅकिव तोहि छवुँ मॉज नाद दिवान। तॅम्य वोनस—‘पख चुँ, असि छि वुनि कॉम।’ दुपहर डौल, मगर सु रूद कामि सूँत्य लॅगिथ। श्रान करनुक ह्योतुन नुँ नावुँय। तमि पतुँ गयि खाहस प्यठ तसुँज्ज जनानुँ तुँ वोननस, ‘श्रान करखना, बतुँ शिठ्योय। चुँ छुख प्रथ कारस हठ करान। कॉम कर पगाह या बतुँ ख्यनुँ पतुँ। दुगाडुँ ह्यथ वोथ बद-रद वनान गूस, गव कोलियि लायनुँ बापथ। वोननस, ‘च्ये छयि बोद ब्रेठेमुँच? वुछान छख ना रूद छुनुँ प्यवान, जमीनुँच कॉम छि सॉरुय प्यथ। अँज्जिचि लटि क्याह ख्यन शुर्य-कॅट्य? सारिनुँय प्येयि बोछि होत मरून। असि छु यी प्रन कोरमुत जि जमीनस

वातनावव ग्वडुं पोन्व, श्रानुक तुं बतुक सोंचव पतुं। वुट्टेकुर मामलुं वुछिथ आयि तसुंज कोलय पोत फीरिथ। दँय दोहस स्यठा मेंहनथ कॅरिथ शामन कोरुन नालि तुं नॅहरि म्युल। पतव अँकिस अन्दस कुन बिहिथ लोग वुछनि, किथुं पाँठय छु नॅहरि हुंद पोन्व डूर्यन मंज 'श्रोन्य' 'श्रोन्य' करान यिवान, अमि पतुं सपुद अँम्य सुंद मन शान्त तुं आनन्द आस। गरुं वॉतिथ द्युत तँम्य ज्ञानानि आलव तुं वोननस, रठ अन वोन्य डोल तुं रज।'' श्रान कॅरिथ बतुं ख्यथ बेफिकिर सपदिथ लोग सु मजस मंज खोख मारनि। जिद गव यि तुं यिहय छि तेज वॉरागुंच मिसाल।

“खाहस मंज पोन्व अननुं बापथ ओस ब्याख अख गूस गोमुत। तसुंज ज्ञानुं येलि गॅयि तुं वोननस, 'ताफ छु स्यठाह, पख वोन्य, यीच कॉम' छिनुं करान," तमि पतुं थोव तँम्य दुगाडुं ओंक तरफ तुं वोननस, 'अच्छा येलि चू वनान छख तुं पख।' (सारी छि असान) तँम्य गूस्य ह्योके नुं पोन्व अँनिथ। यि गॅयि मन्द वॉरागुंच मिसाल।

“हटुं वरॉय यिथुं पाँठय गूस छुनुं खाहस मंज पोन्व ह्यकान अँनिथ, तिथय पाँठय छुनुं मनुश दयि दर्शन कॅरिथ ह्यकान।”

श्री रामकृष्ण—गोडुं ओसुख चू यूत यिवान अमा वोन्य क्याजि छुख नुं यिवान?

विजय—योत यिनुंच छम बडुं खॉहिश रोज्ञान, मगर वोन्य छुस नुं बुं आज्ञाद, ब्रह्म-समाजस मंज छुस नोकरी करान।

श्री रामकृष्ण—कामिनी-कंचन (ज्ञानुं तुं दौलथ) छि जीवस गॉडिथ थवान। जीवुं सुंज आज्ञादी छि चलान।

कामिनी हुंदिय किन्व छि कंचनुंच जोरूरथ आसान, येमि बापथ दोयम्यन हुंज गुलामी प्यवान करून्य; पतुं छुनुं आज्ञादी रोज्ञान, पतुं छुख नुं चू पननि मनुंच कॉम ह्यकान कॅरिथ।

“जयपोरस मंज ऑस्य नुं गोविन्द जियिन्य पूजॉर्य गोडुं गोडुं न्येथुर करान। त्येलि ऑस्य तिम बडुं तीजुंवान। राजुं सुन्दिस बुलावनस प्यठ गॅय नुं तिम अकि लटि ति तुं वोनुख—‘राजुंसुय वॅनिव यिनुं बापथ।’ पतुं राजन तुं पंचव मील्लिथ कोर तिमन नेथुर। तवुं पतुं राजस समखुंनुं बापथ प्यव नुं काँसि ति बुलावुन। तिम ऑस्य—‘महाराज, ऑशीर्वाद दिनि छि आमृत्य, यि छु 'निर्माल्य' ओनमुत कॅरिथ धारन। अज छु गरुं बनावुन, अज छु लँडकस

अन्न-प्रॉविश, अज छु लडकस चाटुंहाल गछनस साथ अमिय कारनव किन्व छु प्यवान युन।”

“तोह्य छिवु यि पानुं वुछान; दोयम्यन हुंजुं कामि करान क्याह छिवुं सपदान। बेयि वुछिव यीत्य इम्तिहान पास करन वॉल्य, यीत्स अंग्रीज्य ज्ञानन वॉल्य पाँडिथ नौकरी करान सुबहन-शामन मॉलिकन हुंघन बूटन हुंघ टूकरू ख्यवान। अम्युक कारन छु सिरिफ 'कामिनी'। न्येथुर कॅरिथ यि सर सबुंज दुनिया वुजारू करनुंच छुनुं यछा सपदान। अर्वुकिन्व छे यि बेयजती, गुलामी हुंज यि लतुं मोंड।”

“योदवय अकि लटि तिथि कुंस्मुकि तेज वॉरागुं सूँत्य भगवान मेलि त्येलि छुनुं ज्ञानन कुंन लॉरिथ गछुन रोचान। गरस मंज रोज्ञनुं सूँत्य ति ज्ञाननि हुंज खॉहिश छुनुं रोज्ञान, तवुं पतुं तस सूँत्य छुनुं कांह बयि (खोफ) रोज्ञान। अगर म्यंकनातीसुंच अख कँन्य आसि बँड तुं अख आसि लोँकुट, तुं शँशतुरस कुस ह्येकि लॉमिथ, बोडुय ह्येकि। दय छु बोड म्यकनातीसुंच कँन्य तुं कामिनी छे लोँकुट म्यकनातीसुंच कँन्य। तुं त्येलि वँन्यतव कामिनी क्या ह्येकि कॅरिथ?”

अख भक्त—महाराज, ज्ञानन सूँत्य करवुं नफरत?

श्री रामकृष्ण—यिमव दय प्रोवमुत छु, तिम छिनुं ज्ञानन तिछि नजरि वुछान, येमि सूँत्य बयि सपदि। तिम छि पजर वुछान जि ज्ञानन मंज छु ब्रह्ममयी मातायि हुंद अमुंश। तुं तिमन माता जॉनिथ तिहुंज पूजा करान। (विजयस कुन) चू आस कुनि कुनि यिवान, चें वुछनुच छम बडुं यछा सपदान।

विजय—ब्रह्म समाजिच कॉम छम प्यवान करून्य, अमि किन्व ह्येकुं न प्रथ विजि यिथ। छुटी मेलनस प्यठ यिमुं।

श्री रामकृष्ण—वुछ, आचार्य सुंज कॉम छि बडुं मुशकिल। ईश्वरुं सुन्द ननि वानुं आदेश (हुकुम) प्रावनुं वरॉय छुनुं लोक शिक्षा यिवान दिनुं। अगर आदेश प्रावनुं वरॉय यियि वोंपदीश दिनुं तुं लूख छिनुं तोर कुन ध्यान दिवान, तथ वोंपदीशस मंज छुनुं कांह ताकथ रोज्ञान। गोडुं साधना कॅरिथ या यिथुं पाँठय गछि ईश्वर प्रावुन। तिहुंद हुकुम मील्लिथ ह्यकव पतुं ल्यकचर दिथ।

विजय—महाराज, ब्रह्म समाजस मंज युस वोंपदीश छु यिवान दिनुं, क्याह तिमव सूँत्य छुना लुकन हुंद वोंदार (उद्धार) सपदान?

श्री रामकृष्ण—मनशस मंज कति छि सों ह्यकथ जि करि दोयम्यन संसारुकि बन्दुं निशि आजाद? यि भुवन मोहिनी माया येम्य सुंज छि, तिमय ह्यकन ये 'मि मायायि निशि आजाद करिथ। सच्चिदानन्द गुरुहस त्रॉविथ छुं दोयिम कांह गथ। यॅमिस ईश्वर-दर्शुन सपुद नुं, तिहुंद आदेश (हुकुम) म्यूल नुं, युस ईश्वर सुंजि शक्ति (ताकत) खोतुं शक्तिशाली (ताकतवर) छुं, तसुंद क्याह मजाल जि जीवन ह्यैकि भव-बधनुं (समसारुकि बंदुं) निश आजाद करिथ?

“बुं ओसुस अकि दोंह पंचवटी निशान झाऊ तलस कुन गछान। अँकिस न्येनि मोंडजि हुंज आवाज गॅयि कनन—म्ये जोन जि सौरफन छि रॅटमुच। स्यठा कालुं पतुं येलि बुं वापस फ्यूरुस त्येलि ति आँस तस न्येनि मोंडजि हुंद क्रकुंनद गछानुंय। ब्रोंह पाहन पॅकिथ तुं आम वुछनुं जि अख कौडियाला सरुफ छु तस न्येनि मोंडजि रॅटिथ—न छुस त्रॉविथ ह्यकान, न छुस न्यंगलिथ ह्यकान, तस न्येनि मोंडजि हुंद समसॉय दोंख छुनुं दूर सपदान। तमि विजि सूच म्ये जि अगर असुंल सौरुफ रटिहेस तें त्रेन् चक्रन मंजुंय प्येयिहे अँमिस दम करुन। अँम्य कौडियालाहन छु रोटमुत, अवय किन्य छि सरफुं सुंज बुरू हालथ तुं न्येनि मोंडजि हुंज ति।

योदवय सदगुरु आसि तुं जीवुं सुंद अहंकार छु त्रेयिवुंय आलवव सूत्य दूर सपदान। गुरु आसि कोच तुं गुरुं सुंज ति छि दोर-दशा तुं शिष्य सुंज ति। शिष्य सुंद अहंकार छुनुं गछान, न छि तसुंदि भवुं बन्दुंनुच फाँसिय छेचनान। कँचिस गुरु सुंदिस दामनस कँरुन थफ तुं शिष्य छुनुं मोख्त गछान।”

विजय—महाराज, अँस्य लूख क्याजि छि यिथुं पॉठ्य गंडनुं यिवान? ईश्वर क्याजि छिन नुं वुछिथ ह्यकान?

श्री रामकृष्ण—जीवुं सुन्द अहमकारुंय छु माया। योहय अहंकार छु कुल आवरनन हुन्द कारन। ‘बुं’ मूदस जि बलाय चँज। योदवय ईश्वरुं सुंजि दयायि सूत्य ‘बुं छुस अकर्ता’ यि ज्ञान सपुद तुं सु मनुश सपुद अदुं जीवन मोख्त। तमि पतुं छुनुं तस कांह भय (खोफ)।

“यि माया या ‘अहम’ छु ओबरुक्य पॉठ्य। ओबरुक अख लोँकुट प्युंत टुकरय कोनुं आसि, मगर तमि किन्य छुनुं सिरियि बोजनुं यिवान। तमिकि दूर सपदुंनु पतय छु सिरियि बोजनुं यिवान। योदवय श्रीगुरु सुंजि दयायि सूत्य

गछि अकि लटि अहम् बोद (अकुँल) दूर तुं पतुं छु ईश्वरुं सुन्द दर्शुन सपदान।

“जीव छु पानुं सच्चिदानन्द स्वरूप, अमा पोंज अमी मायायि या अहंकारुं सूत्य तिम कुँस्मु कुँस्मुचि वोंपादन मंज प्यथ छि गॉमुत्य पनुन स्वरूप मँशरिथ।

“अख अख वोंपाद छि आसान, तुं जीवन हुन्द स्वभाव छु बदलान। काँसि लगाव कुहुँन्य किनारुं दार दूत्य जि वुछिव, लोलुं-बाँतन हुंज तान छि आँसुं मंजुं पानय नेरान, तुं तास गिन्दुन, सॉर चकरुं-हना करनुं बापथ नेरुन तुं अथस मंज केन ह्यथ—यि सोरुय छु पॉन्य पानय लॉगिथ सपदान। चाहे निकुं कनुंर ह्यु आँस्यतन अमापोंज बूट लॉगिथुंय छेँ सीटी बजिन्य शोरु गछान; हेरन प्यठ खसनुं विजि छु साहबन हुन्द पॉठ्य वोँटु तुलिथ खसान। मनशस येलि अथस मंज कलम रोजि तुं तसुन्द छु यि गोन जि युथ-त्युथ कागज टुकरुं मीलिथुंय छु सु तथ प्यठ कलम गँहुन ह्यवान।

“रोंपय ति छेँ अख अँजीब वोंपाद। रोंपय आँसिथुंय छु मनुश अकि दोयमि तरीकुक नफर बनान। सु छुनुं ग्वडन्युक ह्यु रोजान। योत ओस अख ब्रह्मण यिवान गछान। न्यँबुँय ओस सु स्यठा हलीम। केंचि दोह्य पतुं गँय अँस्य कोन्नगर, हृदय ओस सूत्य। अँस्य वँथ्य नुं नावि प्यटुं जि वुछ सुय ब्रह्मण गंगायि बँठिस प्यठ बिहिथ। शायद ओस हवा खोरी बापथ आमुत। असि वुछिथ वोनुन—‘क्या माहरा? वँनिव वारय छिवुं? तसुंज आवाज बूजिथ वोनु म्य हृदस, ‘हृदया। बूजथा, अँमिस छय दौलथ बनेमुँच, अवय छुस आवाजि कुँर गोमुत।’ हृदय लोग असनि।

“ज्ञान प्रॉविथ छु अहंकार दूर ह्यकान सपदिथ। ज्ञानुक लाभ सपदिथ छि समाध लगान। येलि समाध छि सपदान, त्येलिय छु अहंकार चलान। युथ ज्ञान लाभ छु बडुं कटयुन।

“युस ‘बुं’ समसॉरी छु बनान, कामिनी-कंचनस मंज छु फसान, सु छु बदमाश बुं। जीव तुं आत्माहस मंज छु सिरिफ अमि बापथ ‘भेद’ (फरुँख) जि मंज बाग छु यि ‘बुं’ द्रीँट्य गछान। मगर छु सु दर असुंल अकुय पोन्थ; लोरि हुंदि किन्य छि जुं हिस्सु नजरि सपदान।

“यि लूरुय छि ‘अहं’। लूर तुलिव थोद सुय कुनय पोन्थ रोजि।

‘बदमाश बुं’ छु सु युस वनान छु, ‘म्ये’ छुख ना ज्ञानान। म्ये छेँ यीचुं रोंपयि, क्याह म्यानि खोतुं ति छा कांह बोड मोहँन्युव? ‘अगर काँसि दँह

रोंपयि चूरि नियि तूँ ग्वडुँ छु सु चूरस निश रोंपयि निवान, तवुँ पतुँ छु चूरुँ सुंज तिछु मरमथ करान जि पाहलरुँ छुस फुटरावान; यूत कॅरिथ ति छुस नुँ त्रावान, पहरुँदरस छुस हवालुँ करान। तूँ सजा दिवनावान। 'बदमाश' बुँ छु वनान, 'हे अँम्य आसुँ म्यानि दह रोंपयि चूरि नीमचुँ, उफ, यीच ह्यमथ!'।

विजय—अगर 'अहं' वरॉय दूर गॉमुँत्य समसॉर्य बूगव निश थफ वोँथि नुँ—समाधि छुनुँ सपदुँनुँ वाजन्य, त्येँलि छु ज्ञानुँ मार्गस प्यठ युनुय जबर (ठीक), क्याजि तमि सँत्य सपद्यस 'समाधि'। अगर भक्ति योगस मंज 'अहं' रोजि त्येँलि छु ज्ञान योगुँय जान रोजान।

श्री रामकृष्ण—समाधि (समाद) प्रॉविथ छु अँकिस दोन मनशन अहंकार जोरूर दूर गछान, मगर अकसर छुनुँ गछान। वार्याह व्यचार कॅरिव, मगर वुछिव जि 'अहं' फीरिथ-थूरिथ बेँयि हॉजिर सपदान। अज चॅटिव बरगद कुल, पगाह सुबहन वुछिव तथ तर द्रामुत। अथ हालतस मंज अगर 'बुँ छुनुँ दूर सपदन वोल तूँ दियूस रोजनुँ मायलस 'दास (गोलाम) बुँ' बॅनिथ। 'हे ईश्वरुँ! चुँ छुख प्रभु, बुँ छुस दास' अँथ्य भावस मंज रुजिव। 'बुँ छुस दास', 'बुँ छुस भक्त' यिथिस 'बुँ' हस मंज छुनुँ दूश। मिठॉय ख्यनुँ सूत्य छु 'अम्लशूल' (Diabetis) सपदान, मगर नाबद छुनुँ मिठायन मंज गँजरनुँ यिवान।

विजय—महाराज, तोँह्य छिवुँ 'बदमाश बुँ' हस दूर करनुँ बापथ वनान, तूँ क्या सना 'दास बुँ' हस छुना दूशिय?

श्री रामकृष्ण—नँ 'दास बुँ' याने 'बुँ छुस ईश्वरुँ सुन्द दास', 'बुँ छुस तिहुन्द बँखुँत्य' अथ अभिमानस मंज छुनुँ दूशिय, बँल्कि अमि सूत्य छि भगवान मेलान।

विजय—अच्छा, तूँ 'दास बुँ' वॉल्य सुँद्य काम-कूद बेत्रि किथ्य छि आसान?

श्री रामकृष्ण—अगर तसुँदिस बावस मंज पूरुँ पजर यियि तूँ काम-कूद वॅगॉरुक आकार ओतु छु रोजान। अगर ईश्वर लाबुँकि पतुँ ति काँसि हूँद 'दास बुँ' या 'भक्त बुँ' वॅनिथ रोजि तूँ सु मनुश हेँकि नुँ काँसि हूँद नाकारुँ कॅरिथ। पारस कॅन्य लॉरिथ छि तलवार सोँनुँ सुँज सपदान; तलवारि हूँद स्वरूप (आकार) तूँ छु रोजान, मगर सु छुनुँ काँसि मॉरिथ ह्यकान।

“नारजीलकि कुल्युक वॅथूरुँ छु वॅस्य प्यवान, तमिचि जायि छु सिरिफ दाग रोजान येँमि सँत्य यि समजिथ ह्यकान छि जि कुनि विजि ओस अत्यथ

वॅथूरुँ लॅगिथ। यिथय पॉठ्य येँमिस ईश्वर म्यूलमुत छु तँम्य सुँदि अहंकारुक छु मसा निशानुँ खंड रोजान, काम कूदुक स्वरूप (आकार) ओतुय रोजान, तसुँज छि शूर्य सुँज हिश अवस्था रोजान। बालुक (शुर) छुनुँ सत्त्व, रज, तम मंजुँ कुनी गोँनन हूँद्यन गोँनन यिवान वलनुँ। शुर यूत जल्द कुनि चीजस प्यठ अगादि गछान छु, त्यूतुय जल्द छु सु तथ त्रॉविथ ति छुँनान। येँछिवय तूँ पांचन रोंपयन हूँद पलव ह्येकिव तोँह्य दुँबरि हूँदिस तमाशस प्यठ तंबलॉविथ थपि निथ। ग्वडुँ वनि सु—'नँ बुँ दिमुँ नुँ, यि छु म्यॉन्य बोबू जियन मॅल्य अँनिथ द्युतमुत।' तूँ लडकुँ सुँदि बापथ छि सॉरिय बराबर। यिम छि बँड्य, यि छु लोँकुट, यि ज्ञान छुनुँ तस, अवय किन्य छुनुँ तस जाँच पाँच हूँद व्यचार ति। माजि छु वोँनमुत, 'हु छु चोन बोडबोय; पतव आँस्यतन सु कलार (कम जाथ) ति, सु छु तँस्य सँत्य बिहिथ चोँट ख्यवान। बालकस छुनुँ नफरत, श्रूच तूँ छूयट्युक नुँ ध्यान्य, श्रोचरुँ बापथ नुँ म्यचि सँत्य अथुँ छलान।

“काँह काँह छु समाँज पतुँ ति 'भखतुँ सुन्द बुँ' 'दासुँ सुँद बुँ' ह्यथ रोजान। बुँछुस बँखुँत्य 'चु छुख भगवान', यि अभिमान छु बँखत्यन हुन्द बँनिथ रोजान। ईश्वर लँबिथ ति पतुँ रोजान। मुकम्मल 'बुँ' छुनुँ दूर रोजान। तूँ पतुँ अमिय अभिमानुक अभ्यास करान करान छि ईश्वरुँ सुँज प्राप्ति सपदान। योँहय छु भक्ति यूग।

भक्ति हुँजि वति प्यठ पकनुँ सँत्य ति छु ब्रह्मज्ञान सपदान। भगवान छु सर्वशक्तिमान। तिम यछान तूँ ब्रह्मज्ञान ति ह्यकन दिथ। भखुँत छुनुँ अकसर ब्रह्मज्ञान यछान। बुँ छुस दास, चुँ छुख प्रभु, बुँछुस शुर तूँ चुँ छुख माँज—तिम छि युथ अभिमान यछान थावुन।'

श्री रामकृष्ण—अवुँ, व्यचारुँ मार्गु किन्य ति छि तिम मेलान। अँथ्य छि ज्ञानुँ यूग वनान। व्यचारुँ मार्गु छु बडुँ मुश्किल। सप्त भूमि हुँज कथ छि तोँहि वँन्यमुँच। सँतिमि भूमि प्यठ मनकि वातुँनुँ सँत्य छि समाध सपदान, 'ब्रह्म पोँज, जगत मिथ्या' यि बूद सपदुँनस प्यठ दफ मनुक लय सपदान, समाध सपदान। मगर कलि योगस मंज छु जीवन हूँद प्राण अन्नस मंज, ब्रह्म पोँज, जगत मिथ्या यि बूद किथुँ ह्यकि पतुँ सपदिथ? शरीरुँ बुद्धि दूर गछनुँ वरॉय छुनुँ युथ बूद सपदान। बुँ न छुस शरीर, न छुस मन, न छुस चोँवुह त्वथ (तत्त्व), बुँ छुस सोँखस तूँ दोँखस निश दूर। म्येँ क्युथ त्येलि रूग, क्युथ शूक, क्युथ बुजर, क्युथ मरुन?—युथ बूद सपदुन छु कलि कालस मंज कट्युन।

चाहे यूत व्यचार कॅरिव दीह-आत्म बुद्धि छे' कुनि नतुं कुनि यिवानुंय बड कुल चेट्टयतोन, त्वोह्य छिवुं समजान जि मूलुं सान छुन प्रॉटिथ तुं चॅटिथ, मगर दौयिमि दोंहुं सुबहनस वुछिव तथ तर द्रामुत। दीह-अभिमान छुनुं दूर सपदान, अवय मो'खुं छु कलिकालस मंज भक्ति यूगुय जान, स्योद छु।

“तुं, बुं छुस नुं मोंदरेर बनन यछान, मोंदरेर ख्योनुय छु म्य जान बासान। म्ये' छुनुं जांह ति यि खाँहिश सपदान जि वनुं—'बुंय छुस ब्रह्म।' बुं छुस वनान जि 'चुं छुख भगवान, बुं छुस चोन दास।' पाँचिमि तुं श्येयिम भूमि (जायि) मंज चकर करुन्य छु ठीक। श्येयिम भूमि (जाय) तॅरिथ सॅतिमि भूमी (जायि) मंज ज्यादुं कालस तान्य रोजुनुंच छुनुं म्ये' यछा आसान। बुं करुं त्युहुंद नाव-ग्वनन हुंद कीर्तन, यिहय छि म्यॉन्य यछा। सेव्य-सेवक सुन्द भाव छु बडुं जान। बे'यि वुछिव, यिमुं तरंगुं छि गंगायि हुंजय, मगर तरंगन हुंज छि गंगा, यि छुनुं कांह वनान। 'बुं छुस सुय' यि अभिमान छुनुं ठीक। दीह-आत्म बुद्धि रुजिथ युथ अभिमान यस आसान छु तस छु स्यठा नोकसान सपदान, तमि पतुं छुनुं सु ब्रोंह कुन बडान। वारुं वारुं छु पत्यथ गछान (गिरान)। सु छु दौयम्यन हुंजन अँछन सूर छँनान। सँती पनन्यन अँछन ति। पननि जायि हुंद हाल छुनुं सु जाँनिथ ह्यकान।

“मगर तीर्यन हुंद्य पाँठ्य अख-अँकिस पतुं पतुं पकनुं सूत्य भक्ति करुन्य छुनुं ईश्वर प्रावनावान। तिमन लबनुं बापथ गछि 'प्रेम भक्ति' आसुंन्य। 'प्रेम भक्ति' हुन्द ब्याख नाव छु 'राग भक्ति'। प्रेयम या अनुरागुं वरॉय छुनुं भगवान मेलान। दयस प्यठ यो'ताम लोल छुनुं सपदान तोतान्य छुनुं तिमन कांह ति प्रॉविथ ह्यकान।

“बे'यि अकि कुँस्मुंच भक्ति ति छि तथ छु नाव 'वैधी भक्ति'। यूत जफ आसि करुन, वो'पवास (फाकुं) आसि दरुन, तीर्य यात्रा आसि करुन्य, यीत्यव रंगव तुं तरीकव सूत्य आसि पूजा करुन्य, बली आसि दिन्य—यि सारुय गॅयि वैधी भक्ति। अम्युक स्यठाह केँह अनुष्ठान करान-करान छि वारुं वारुं राग भक्ति सपदान। योतान्य नुं राग भक्ति सपदि तोतान्य मेलिनुं दय। तिमन गछि लोल बरुन। ये'लि समसॉर्य बो'द बिलकुल चलि—पुरे शुराह आनु लगि मन तिमनुंय प्यठ। तमि पतुं मेलन तिम।

मगर काँसि छि राग भक्ति पाँन्य पानय सपदान। स्वतः स्यद, लो'कुं चारुं प्यठय। ल्वकुं चारुं प्यठय छु सु दयि सुंदि बापथ वदान, यिथुं पाँठ्य प्रहलाद।

‘विधि वादीय’ भक्ति किछ छि? यिथुं पाँठ्य हवा करनुं बापथ वावुंज हिलावुंन्य। हवा बापथ छु वावजि हुंद जोरुरत। दयस प्यठ अनुराग वो'पदावुं बापथ छु जफ, तफ, वो'पवास (फाकुं) बेत्रि व्यंज माननुं यिवान। मगर ये'लि दख्युन किन्य हवा पानय चलान छुं तमि पतुं छि लुख वावुंज होर कुन थवान। दयस प्यठ अनुराग (माय) लोल, पाँन्य पानय यिनुं पतुं छि जप, तप बेत्रि कर्म छे'नुं गछान। भगवत प्रेयमस मंज मस्त सपदुंनुं सूत्य जोरुरी कर्म करनुं बापथ कस छु तवुं पतुं समय (वक्त)।

“योत तान्य नुं तिमन प्यठ लोल तुं माय सपदि, तोताम छि सो' भक्ति कॅच्य भक्ति। ये'लि तिमन प्यठ लोल वो'पदि, त्ये'लि छि सो' भक्ति पोखुं भक्ति वननुं यिवान।

“ये'म्य सुँज भक्ति छि कॅच सु छुनुं दयि सुंज कथा तुं वो'पदीशन हुंज धारना कॅरिथ ह्यकान। पकुं भक्ति सपदुंनस प्यठुंय छि धारना सपदान। फोटूग्राफुंकिस शीशस प्यठ यो'दवय मील (Silver nitrate) लॅगिथ आसि तुं युस तस्वीर तथ प्यठ प्यवान छु सु छु हू ब हू तथ प्यठ तरान, मगर सादुं शीशस प्यठ चाहे सासुं बॅद्य तस्वीर हाँविव जि सु तति त्युथुय सफेद शीशुं। दयस प्यठ लोल सपदनुं वरॉय छुनुं वो'पदीशन हुंज धारना सपदान।”

विजय—माहरा, ईश्वरस यो'दवय कांह ये'छि प्रावुन, त्युहुंद दर्शुन ये'छि करुन तुं क्याह सिरिफ भक्ति सूँतिय अन्धा कॉम?

श्री रामकृष्ण—अवुं भक्ति सूँतिय छु त्युहुंद दर्शुन सपदान। मगर पकुं भक्ति, प्रेमा भक्ति, रागुं भक्ति गछि। तमी भक्ति सूँत्य छि तिमन प्यठ लोल सपदान, यिथुं पाँठ्य बचन हुंद माजि प्यठ लोल, माजि हुन्द बचस प्यठ लोल तुं कोलयि हुंद रूनिनस प्यठ लोल तुं माय छु।

“यि लोल, यि रागभक्ति सपदुंनस प्यठ, जनानुं-न्यचुव तुं पननिस परिवारस कुन छुनुं ब्रूट्यु ह्यू खिचाव रोजान तमि पतु छि तिमन प्यठ दया सपदान। गरुंबार छु वो'पर मुलुख ह्यू बासान। तथ वुछिथ छु सिरिफ अँकिस कर्मभूमी हुन्द खयाल वुजान। यिथुं पाँठ्य गरुं गामस मंज तुं कलकता छु कर्मभूमी। कलकता छु किरायि मकानस मंज रोजुन प्यवान, कर्म करनुं बापथ। ईश्वरस प्यठ प्यार सपदुंनुं सूँत्य समसारुं लोर, विषय ब्वद—रोजि बिलकुल दूर गछान।

“विषय बुद्धि हुंद लीश मातुर रूजिथ छुनुं तिहुंद दर्शुन सपदान। गंदख

तुज अगर अँदुर आसि चाहे यूत रगड्यून सों छनुं दजानुंय—दर्जनुं वादुं तुजि छि फोजूल बरबाद सपदान। विषयन लोर मन छू अँदुर गन्दख तुज।

विजय—महाराज, क्याह पेयि करुन येमि सूँत्य ईश्वरुं सुन्द दर्शुन सपदि?

श्री रामकृष्ण—चित्त-शुद्धि वरॉय छुनुं ईश्वरुं सुन्द दर्शुन सपदान। कामिनी—कंचनस मंज प्यथ छु मन मँल्युन सपुदमुत, तथ मंज छु जंग लोगमुत। सुचनि मंज रब लारनुं सूँत्य छुनुं तथ म्यकनातीस खिंचिथ ह्यकान। मनुक मल छु न्यतरन हुंदि अशिवानि सूँत्य छुलनुं यिवान 'ही ईश्वरुं, वोँन्य करुं नुं तिछु काँम' यि वँनिथ योँदवय काँह प्रायाशच्यथ करान वदि तुं मल छु छलनुं यिवान। त्येलि छु दयि रूँपी म्यकनातीस मनुंरूपी सुँचनि लमान (कँशिश करान) त्येलि छि समाध सपदान, ईश्वरुं सुंद दर्शुन सपदान।

“मगर कूशिश चाहे यीचाह करिब, तिहिंज दयायि वरॉय, छिनुं तिहिंद दर्शन बनान। तव पतुं कयाह कृपा छा सँहलुंय पाँठ्य सपादान? अहंकारुक गछि पूरुं पाँठ्य त्याग छुनुन करिथ। बुँ छुस कर्ता, अमि ज्ञानुंकि रूजिथ छुनुं दयि-दर्शुन सपदान। भंडारस मंज अगर काँह आसि तुं तमि पतुं अगर वनि गरिकिस मॉलिकस काँह जि तोँह्य पँकिव पानुं तुं दियिब चीज कँडिथ, तुं सु छु यिय वनान—‘तत्यथ छु अख मोँहन्युव, त्येलि क्याजि गछुं बुँ? युस पानुं कर्ता बँनिथ आसि, तसुंदिस हृदयस मंज छुनुं ईश्वर आसॉनी सान यिवान।’

“कृपा सपदुंनुं सूँत्य छु दर्शुन मेलान। तिम छि ज्ञानुं सिरियि। तिहिंजि अकिय किरनि (प्रवि) सूँत्य छु समसारस मंज यि ज्ञानुं प्रकाश फॉल्योमुत। तँम्य सुंदी सूँत्य छि अँस्य अख अँकिस परजुँनावान तुं समसारस मंज कूँति प्रकॉर्यचि विद्यायि ह्येँछान। पनुन प्रकाश योँदवय तिम अकि लटि पननिस बुथिस ब्रॉहकनि थवन तुं सपदि दर्शुन। सार्जट छु राथ क्युत अनिगॉटिस मंज अथस क्यथ लालटीन ह्यथ फेरान, मगर तसुंद बुथ छुनुं काँह ह्यकान वुछिथ। मगर तमी लालटीनुंकि गाशि सूँत्य छु सु सारिनुंय वुछान, तुं पानुं वॉन्य छि सॉरी अख अँक्यसुन्द बुथ वुछान।

“योँदवय काँह सार्जटस वुछुन येँछि तुं तस व्यनती करि, वन्यस—‘साहब, लालटीन अँन्यतव पानस बुथिस ब्रॉहकुन; त्वोँह्य वुछहोव अकि लटि।’ ईश्वरस कुन गछि प्रार्थना करुँन्य जि भगवन्। अकि लटि कृपा

कॉरिथ कॅर्यतव पननि ज्ञानुक प्रकाश पननिस शूबिदार मोँखस प्यठ दारन; बुँ करुं तुहुंद दर्शुन। गरस मंज योँदवय चोंग दजि नुं तुं सु छे' गॅरीबी हुंज चेंनुवन्य। हृदयस मंज गछि ज्ञानुक चोंग जालुन। ‘हृदयि मंदरस मंज ज्ञानुक चोंग जॉलिथ वुछिव ब्रह्ममयी हुंद शूबिदार मोँख’।”

विजयन छु पानस सूँत्य दवा ति ओँनमुत श्री रामकृष्णस ब्रॉहकनि चेंयि। दवा छु पॉनिस सूँत्य मिलनॉविथ चनुं यिवान। श्रीरामकृष्णन अनुंनोव पोन्थ। श्री रामकृष्ण छि अहेतुक कृपायि हुंघ सागर। विजय छुनुं किरायि गाडि मंज या नावि मंज यिनस समर्थ, इसलिये कुनि कुनि छि तिम पानुं नफर सूँजिथ तिमन बुलावान। येँमि लटि ओसुन बलराम सूँजमुत। किराय दियि बलराम। विजय छु बलरामस सूँत्य आमुत। शाम वखतस खँत्य, विजय, नवकुमार, तुं तिहिंघ दोँयिम सॉथी बलरामनि नावि प्यठ। बलराम त्रावि तिमन बाग बाजॉरुंकि गाठस प्यठ। मास्टर ति आय सूँत्य।

शोंकुरवार 9 मार्च, 1883

श्री रामकृष्ण छि दखिनीश्वरुं मन्दरुँकिस पननिस कमरस मंज राखाल, मास्टर बेत्रि अँकिस दोँन बँखत्यन सूँत्य बिहिथ। माघुँ मावस सुबहुक आसि आँठ नौ बजे हुंद समय।

मावसि हुन्द दोँह छु। श्री रामकृष्णस छु लगातार जगत मातायि हुंद उद्दीपन सपदान। तिम छि वनान, “ईश्वरुँय छु वस्तु बाकुँय सोरुय अवस्तु माजि छु पननि महामायायि जरियि मुहित थोवमुत कॉरिथ। मनशन मंज वुछिव, बद्ध (गॉडिथ) जीवुय छि चँर्य। यूत दोँख तुं कष्ट छि प्रावान, तोति तँथ्य ‘कामिनी-कांचन (जनि तुं दौलतस) मंज तिहिंज माय। कँड्यलद गासुँ ख्यनुं विजि छु ऊँटुँ सुँदि आँसु मंजुँ दर-दर कॉरिथ खून वसान, तोति छुनुं सु तथ त्रावान, ख्यवानुँय गछान। प्रसनुं विजि अजॉरुंकि तकलीफुँ विजि छि जनानुं वनान—‘ओह, वोँन्य गछुँ नुं बेँयि रूँनिस निश, मगर पतुं छे’ बेँयि मँशुरावान।

“वुछिव तिहुंद पय लबनुं बापथ छुनुं काँह कूशिश करान। अननाट (मेवुँ) त्राँविथ छि लूख तम्युक वँथुर ख्यवान।

भक्त—महाराज संसारस मंज क्याजि छि तिम थवान?

श्री रामकृष्ण—समसार छु कर्म क्षेत्र। काँम करान करानुँय छु ज्ञान

सपदान। गुरुहन वो'न यिम कर्म कॅरिव तूँ यिम कर्म मुँ कॅरिव। पतुँ छि तिम निष्काम कर्म करनुँक उपदेश दिवान। कर्म करान करान छु मनुक मल छलनुँ यिवन। जान डाकटरँ सुन्दिस यलाजस तल रोजनुँ सूँत्य छु तसुन्द वो'नमुत दवा ख्यवान ख्यवान कांह ति बे'मॉर्य ऑस्यतन, सो'ठीक गछान।

“समसारँ मंजुँ क्याजि नुँ तिम त्रावान? रूग गछि ठीक त्ये'लि त्रावन। जनि तूँ दौलतुक तमाह ये'लि नुँ रोजि, त्ये'लि त्रावन। हस्पतालस मंज नाव लीखिथ चॅलिथ यिनुक वो'पाय छुनुँ। ब्यमारि हुंज कसर रूजिथ त्रावि नुँ डाक्टर।”

श्री रामकृष्ण छि अजकल जसुदायि हुंघ पाँठ्य हमेशुँ वात्सल्य रसस मज मगन रोजान। अवय किन्य छुख राखाल सूँत्य थोवमुत। राखालुँ सुंदि बापथ छु श्री रामकृष्णस गोपाल-भाव। यिथुँ पाँठ्य माजि हुंज कोछि मंज लो'कुट लडकुँ गॅछिथ छु बे'हान, तिथय पाँठ्य ऑस्य राखाल ति श्री रामकृष्णुँ सुंजि कोछि नखुँ-डखि बे'हान। मॉन्यतव मो'मुँ ओस चवान।

श्री रामकृष्ण ऑस्य अँथ्य भावस मंज बिहिथ, अमी वखुँ दिच अँक्य नफरन खबर जि बान* छु यिनुँ वो'ल। श्री रामकृष्ण राखाल, मास्टर साँरी गँय बान वुछनुँ बापथ पंचवटी कुन दोरि सान। पंचवटी तलुँकनि यिथ छि साँरी बान वुछान। दुहचि करीब साडुँ दँह बजे हुंघ वख आसि। अँकिस नाविहुंज हालथ वुछिथ छि श्री रामकृष्ण वनान, “वुछिव, वुछिव, हुथ नावि छनुँ पता क्या हालथ गछि।”

श्री रामकृष्ण (मास्टरस कुन)—अच्छा बान किथुँ कॅन्य छु यिवान?

मास्टर छु जमीनस प्यठ रूखुँ खॅनिथ पृथ्वी, चॅन्दुर, सिरियि, मँज्युम खिचाव ज्वार-बाटा, पुनिम, मावस, गृहुन बेयि समजावनुच कूशिश करान।

श्री रामकृष्ण (मास्टरस कुन)—यि वुछ। समुँजान छुस नुँ। कलुँ छु नचान। चकर छु यिवान। अच्छा, यीति दूरिचि कथुँ किथुँ पाँठय ज्ञान्यथ?

“वुछ, बुँ ओसुस लो'कचारस तस्वीर जान पाँठ्य बनाविथ ह्यकान। मगर हिसाबुँ सूँत्य ओसुम कलुँ चकरावान। हिसाब ह्यो'कुस नुँ ह्ये'छिथ।”

* बंगालुँ किस लो'कटिस सँदरस मंज छु ज्वार यिनस प्यठ तम्युक स्यठा पो'न्य गंगायि मंज अचान तूँ सुँ बडुँ-बारुँ पाँ गुँथ छि थजुँ लहरुँ बॅनिथ गृजान गंगायि हिंदिस पो'त पासस प्यठ वुलटुँ तरफस कुन जोरुँ सान बडुन ह्यवान। अथ छि 'बान' वनान।

मंदिन्युक ख्यन ख्यथ कोर श्री रामकृष्णन हना आराम। वारुँ वारुँ आय अधर तूँ बाकुँय भक्त वाँतिथ। अधर सेन छु ग्वडनिचि लटि श्री रामकृष्णुँ सुंद दर्शुन करान। अधर सुंद मकानुँ छु बेनटोला, कलकत्ता हस मंज। तिम छि डिप्टी मजस्ट्रेट। वुमुर आस्यख कुनत्रुँह, त्रिह वॅरियि ह्यु।

“ज्यादुँ व्यचार करुन छुनुँ ठीक, माजि हुंघन पादि कमलन मंज भक्ति रोजनुँ सूँतिय सपदि। ज्यादुँ व्यचार-करनुँ (सननुँ) सूँत्य छु सोरुय गोल मोल सपदान। यथ मुलकस मंज तालाबुक पो'न्य च्ये'यिव प्यटुँ-प्यटुँ, जान साफ पो'न्य लॅबिव; ज्यादुँ बो'न अथुँ त्रावनुँ हिलावनुँ सूँत्य छु पो'न्य मॉलुँ सपदान। इसलिए कॅरिव तिमन भक्ति हुंज प्रार्थना।

भक्त—क्या माहरा ईश्वरस छा ह्यकान वुछिथ?

श्री रामकृष्ण—अवुँ, जोरुँर यिवान छु वुछनुँ। निराकार-साकार दोशवय छि यिवान वुछनुँ। चिन्मय साकार रूपुक दर्शुन छु सपदान। तवुँ पतुँ साकार मनशि रूपस मंज ति छि तिम प्रो'खुट सपदान। अवतारस वुछुन तूँ ईश्वरस वुछुन गँयि कुनिय कथ। ईश्वरुँय छु योगस योगस मंज मनुँशि रूपस मंज अवतार धारन करान।

आथवार 11 मार्च 1883

कॉली मन्दरस मंज छु अज श्री रामकृष्णुँ सुन्द जन्मोत्सव (वो'हर वोद)। फागनुँ जूनुँपछि दो'य, अज मनावन श्री रामकृष्णुँ सुंद नजदीकुँक्य बॅखुँत्य तिमन सूँत्य त्युहुंद वो'हर वोद।

सुबुह प्यठय छि बॅखुँत्य अख अख कॅरिथ ह्यवान समुँन्य। ब्रोंहकनि छु माता भवतारिनी हुन्द मन्दर। मंगल आरती पतय छि प्रभाती रागिनी मंज मो'दुर तान लगाविथ नौबत बजान। सो'न्तुक खो'श गवार मूसिम छु, थरि-कुल्य कॅट्य छि नॅव्य फटुँवुँन्य ऑविल्य तूँ जाँविल्य पनुँवॅथुरव सूँत्य लहरावान द्रींठ्य गछान। यपाँय श्री रामकृष्णुँ सुंदिस जन्मुँदो'हुँच याद कॅरिथ बॅखत्यन हुंघन दिलन मंज आनन्दुक समन्दर वो'तलान। चो'वा पाँय छु आनन्दुक हवा बाशि करान। मास्टरन वुछ, यूत सुलिय छि भवनाथ, राखाल, भवनाथुन यार काली कृष्ण आमुँत्य। श्री रामकृष्ण छि पूर्य किन्य किस बरामदस मंज बिहिथ यिमन सूँत्य खो'श पाँठ्य कथ-बाथ करान। मास्टरन कोर जमीनस प्यठ कलुँ थाविथ प्रणाम।

श्री रामकृष्ण—(मास्टरस कुन)—चुँ आखुँ। (बेखत्यन कुन) लजा (शर्म) नफरत, भय (खोफ) यिम त्रेँ रूज्जिथ छनुँ कॉम स्यद गछान। अज कूताह आनन्द आसि। मगर यिम लूख भगवत नावस मंज मस्त रूज्जिथ नचुन—ग्यवुन ह्यकन नुँ केरिथ, तिमन सपदि नुँ कुनि केँह। ईश्वर सुंज कथा केरिथ किछ शर्म तुँ क्युथ भय? अच्छा, वोन्य ग्यविव तोह्य।

गुल्य गंडिथ, मन लगाविथ छि बिहिथ श्री रामकृष्ण ग्यवुन बोजान। ग्यवुन बोजान बोजान वोत युहुन्द मन स्योदुय भाव राज्यस मंज। श्री रामकृष्ण सुन्द मन छु होछ गंदख तुज। अकि लटि गँहनुँ सूत्य छेँ उद्दीपना सपदान। दुनियौवी लूकन हुंद मन छु अँदुर गंदख तुज, कूताह ति गँह्य तव अमापोज दजान छनुँ, क्याजि सुँ छु विषयन मंज वलनुँ आमुत। श्री रामकृष्ण छि बडुँ चेर ताम ध्यानस मंज लँगिथ। केँचि कॉल्य पतुँ छि काली कृष्ण भवनाथस केँह वनान।

काली कृष्ण वोथ्य श्री रामकृष्णस प्रणाम केरिथ थोद। श्री रामकृष्णन प्रुछ हॉरान गँछिथ, “को त गछख?”

भवनाथ—केँह कॉम, माहरा छस, अवय छि यिम गछान।

श्री रामकृष्ण—क्या कॉम छवुँ?

भवनाथ—मेहनत कशन हुंदिस चाटुँहालस मंज छि गछान।

श्री रामकृष्ण—कुँ स्मतस मंजुँय छनुँ। अज कोताह छु दयि नाव—कीर्तनस मंज आनन्द सपदान। वुछुन नुँ। तसुँन्दिस कुँ स्मतसुँय मंज ओस नुँ।

दुहचि साडुँ ओठ या नौ बजे आसन। श्री रामकृष्णन कोर नुँ अज गंगायि मंज श्रान। शरीर छु हना नाठीक। नोट ओनुख पोन्थ बेरिथ बरामदस प्यठ। भक्त छि तिमन श्रान करनावान।

श्रान केरिथ छि मोंदरि हटि भगवानुँ सुन्द नाव ह्यवान। छँल्यमुँत्य पलव लँगिथ छि अँकिस दोन भक्तन सूँत्य आंगनुँ मँज्य नीरिथ कॉली मातायि हुंदिस मन्दरस कुन गछान। म्वखुँ (ओँसुँ) सूँत्य छि लगातार दयि नाव स्वरान। नजर छख नुँ न्यबर कुन।

दूलन फाह दिनुँ विजि यिथुँ पॉठ्य चर्यन (जानवरन) हुँज नजर आसान छि तिथय पॉठ्य छख सपदान।

कॉली मातायि हुंदिस मन्दरस मंज गँछिथ कोर तिमव प्रणाम तुँ पूजा।

पूजायि हुंद ओस नुँ कांह नियम-गंध-पुष्प (चंदन टयोँक बेत्रि मुश्कुँदार चीज मँलिथ पोश ओँस्य कुनि मातायि हुंदन पादन लागान तुँ कुनि पननिस कलस प्यठ लगान। ओँखरस मातायि हुंद न्यरमाल कलस प्यठ थविथ वोनुख भव नाथस—“यि रठ डाब (कोच नारजील) मातायि हुंद प्रसादी ओस डाब।”

वोन्य वॉत्य श्री रामकृष्ण पनुँनिस डेरस प्यठ। वुछुख जि बेयि ति केँह बेखुँत्य छि आमुँत्य। राम, नित्य गोपाल, केदार चटर्जी वगोरू वार्याह लूख छि आमुँत्य। तिमव कोर श्री रामकृष्णस पथर प्यथ प्रणाम। तिमव ति प्रुछ तिमन खबर-अतर।

श्री रामकृष्ण—(भक्तन कुन) येलि अवतार छि यिवान आम लुख छिनुँ तिमन जाँनिथ ह्यकान। तिम छि खँटिथ यिवान। जुँय चोरय अन्तरंग बेखुँत्य छि तिमन जाँनिथ ह्यकान। राम ओँस्य पूरन ब्रह्म, पूरन अवतार ओँस्य, यि कथ ओँस सिरिफ बाहन ऋशेन मोलूम। बाकुँय ऋशेव ओसुस वोनमुत, “राम, ओँस्य छिथ सिरिफ दशरथुँ सुंद न्यचुव समुँजान।”

रछ खंड पतुँ आय कोनगरुँ प्यठुँ केँह बेखुँत्य मृदंग तुँ जांज ह्यथ कीर्तन करान बागस मंज। मनमोहन, नबाई बेत्रि वार्याह लुख वॉत्य नामुँ-कीर्तन करान श्री रामकृष्णस निश तँथ्य वोंतुर-पूर्य किस ब्रांडस प्यठ। श्रीरामकृष्ण छि भगवत् प्रेयमस मंज पागल सपदिथ तिमन सूँत्य मीलिथ कीर्तन करान। नचान नचान छख मँज्य मँज्य समाध लगान। तेलि छि संकीर्तनस मंजुँ बेह्यस सपदिथ खड़ा रोजान। तँथ्य अवस्थायि मंज सजाँव्य बेखत्यव तिम बजव बजव पोशि मालव सूँत्य। बेखुँत्य छि वुछान। जन तुँ ब्रोठुँ कनि छि श्री गौरांग खड़ा। सनि भाव समाधि मंज छि मगन। श्री गौरांग सुँद्य पॉठ्य छि श्री रामकृष्णुँ सुँजुँति त्रेँ दशायि कुनि अन्तर्दशा—तेलि छि जड चीजुक्य पॉठ्य यिम बेहोश तुँ बेहरकत सपदान। कुनि अर्द्धबाह्य दशा—तेलि छि प्रेयमुँ सूँत्य परिपूर सपदिथ करान। तुँ पतुँ बाह्य दशा—तेलि छि बेखत्यन सूँत्य कीर्तन करान। नॉल्य छख पोशि मालुँ। युथ नुँ वेंस्य प्यन अवेँकिन्य छु अख भक्त यिमन थफ केरिथ। चोवा पासे छि भक्त वोथेदनि मृदंग तुँ जांज ह्यथ कीर्तन करान। श्री रामकृष्णुँ सुँज नजर छि अकिय दरुँ लँगिथ। यिहिन्दिस मॉर्यमंदिस म्वखस प्यठ छि प्रेयमुँच गाहुँ जोतान।

केँचि कॉल्य थक कँडिथ बीठ्य पतुँ श्री रामकृष्ण अख नोव ल्योदुर

पलव लॉगिथ पननि ल्वकचि चारपायि प्यठ। आनन्दमय महापोरशुं सुंजि तथ बेमिसाल प्रजलवुनि तुं शूबिदार सूरच हुँद दर्शुन छि बँखुँत्य वुछान। मगर वुछनुँच त्रेश छखनुँ फुटान। तिम छि सोचान जि यि रोजहव वुछानुय। अथ रूंपुँ समन्दरस मंज फटुँहव।

श्री रामकृष्ण लँग्य बतुँ ख्ये 'नि। बँखत्यव ति कोर नवीद।

बतुँ ख्यनुँ पतुँ छि श्री रामकृष्ण ल्वकटिस तख्तस प्यठ बिहिथ आराम करान। कमरस मंज छि लुकन हुंज बीरुँ बडान। न्यबरिम ब्रांडु ति छि लुकव सूँत्य बँरिथ। कमरस अन्दर छि जमीनस प्यठ बँखुँत्य बिहिथ तुँ छि श्री रामकृष्णस कुन मुदय गौँडिथ वुछान। केदार, सुरेश, राम, मनोमोहन, गिरीन्द्र, राखाल, भवनाथ, मास्टर बेत्रि स्यठाह लुख छि तति मूजूद। राखाल सुंद मोल छु आमृत, तिमति छि तँती बिहिथ।

अख वैष्णव गोसोन्य ति छु तँथ्य जायि प्यठ बिहिथ। श्री रामकृष्ण छि तिमन सूँत्य कथुँ करान। गोसान्यन बुछ्यथुय छि श्री रामकृष्ण कलुँ नोमरौविथ नमस्कार करान—कुनि विजि अँस्य तिमन ब्रौठकनि साष्टांग नमस्कार करान।

श्री रामकृष्ण—अछा, तोह्य क्याह छिवुँ वनान? वोपाय क्याह छु?

गोसोन्य—माहरा, नावुँ सूँतिय सपदि प्रथ कँह, मतलब सोरुय। कलि योगस मंज छि नावुँच बडुँ महिमा।

श्री रामकृष्ण—अवुँ, नावुँच छि बडुँ महिमा ओँसिथुँय। मगर अनुरागुँ (मायि) वरौय क्याह सपदि? ईश्वरुँ सुँदि बापथ गछन प्रान व्याकुल गछँन्य। सिरिफ रोजुँ नाव ह्यवान मगर च्यथ आसि कामिनी तुँ कांचनस (जनि तुँ द्यारन) मंज, अमि सूँत्य क्याह बनि?

“मौँन्यतव जि नावुँ सूँत्य गव जीव अकि लटि श्वद। मगर सु छु ब्ये'यि कँस्मुँ कँस्मुँ क्यन पापन मंज लोर गछान। मनस मंज छुनुँ ताकथ, सु छुनु प्रन करान जि ब्ये'यि करनुँ पाप। गंगा श्रान कँरिथ छि सौरी पाप छलनुँ यिवान ति गव ठीक, मगर सौरी छि वनान जि तिम पाप छि अँकिस कुलिस प्यठ खँसिथ ब्यहान। ये'लि सु मोहँन्युव गंगाजी प्यटुँ श्रान कँरिथ छु यिवान तुँ तिम प्रौँन्य पाप छि कुलि प्यटुँ वो'ठ त्रौँविथ बे'यि तस कलस खसान। (सारिवुँय ओँस) तिमवुय प्रान्यव पापव वो'ल सु बे'यि। जु चोर कदम ब्रौँह कुन पँकिथुँय कँरुँ हाँस थफ।

“अवुँकिन्य सोर नाव ति, सूँतिय कर प्रार्थना ति। यि अमि बापथ जि

दयस प्यठ गनि माय तुँ यिम चीज दौन दौहन बापथ छि—यिथुँ पौँठ्य धनुँ, मान (यज्जथ) शरीरुँ स्वख बेत्रि—तिमन निशि छ्ये'नि माय।

(गोसौनिस कुन) “अगर शौँजर आसि तुँ त्ये'लि मेलि सारिवुँय धर्मव किन्य दय। वैष्णवन ति मेलि तुँ शाक्तन ति, वेदाँत्यन तुँ ब्राह्मनन ति, मुसलमान तुँ किरन ति। दिलुँकिन्य चाहत थवनुँ सूँत्य मेलन सारिवुँय।

काँह काँह छु लडौँय ब्यहान करनि। तिम छि वनान। जि सौनिस श्रीकृष्ण सुंद भजन करनुँ वरौय बनिनुँ कँह। या सानि काली मातायि हुंद भजन करनुँ वरौय सपदि नु कँहति। या सोन ईसौँय धर्म प्रावनुँ वरौय सपदि नुँ कँह। अथ बोँज छि वनान हठ धर्म। याने म्योन्युय धर्म छु ठीक तुँ बाकुँय सौरी छि गलथ। यि ब्वद छि खराब। भगवानस निश ह्यकव अँस्य वार्याहव वतव वौँतिथ।

“पतुँ छि काँह काँह वनान जि ईश्वर छु साकार, निराकार छुनुँ। यि वौँनथ छि तिम ब्यहन लडौँय करनि। युस वैष्णव छु सु छु वीदाँतिस सूँत्य लडान।

“अगर ईश्वरुँ सुंद साख्यात दर्शुन सपदि, तु त्ये'लि सोरुय हाल ठीक—ठीक पौँठ्य वननुँ। येँम्य दर्शुन कोरमुत छु सु छु ठीक जानान जि भगवान छु साकार ति तुँ निराकार ति। तिम क्या क्या छि बे'यि, यि कुस वनि!

“कँह अँन्य गँय अँकिस हँस्तिस निश अँक्य वौँन यँमिस चारवौँयिस छि वनान होँस। तिम पतुँ वोनुख अन्यन—होँस क्युथ छु? तिम लँग्य हँस्य सुंद पान सारनि। अँक्य वौँन होँस छु कूटिस ह्यु। तँम्य ओस हँस्य सुंद खोर सोरमुत। दौँयिम वौँन होँस छु शुप ह्यु। तँम्य सुंद अथुँ अँस्य हँस्य सुन्दन कनन प्यठ प्येमुँत्य। यिथय पौँठ्य काँसि रँट यड तुँ वौँनुस क्याह तान्य, काँसि रोट करुँ तुँ वौँनुन क्याह तान्य। यिथय पौँठ्य ईश्वरस मुतलख येँम्य यूत वुछ तँम्य सूच यी जि भगवान छु बस युथुय बे'यि नुँ किँही।

(गोस्वामी हस कुन)—“ईश्वरस सिरिफ साकार वननुँ सूँत्य क्याह बनि। तिम छि श्रीकृष्ण सुंद पौँठ्य मनशि रूप लॉगिथ यिवान, यिति छु पोँज। वार्याहव रूँपव किन्य बँखत्यन दर्शुन दिवान, यिति छु पोँज। बे'यि छि तवपतुँ निराकार अखण्ड सत्चित्तानन्द, यिति छु पोँज। वीदव छु तिमन साकार ति वौँनमुत निराकार ति वौँनमुत। सोँगुन ति वौँनमुत तुँ निर्गुण ति।

केदार—श्रीमद्भागवतस मंज छि व्यासदीवन त्रनदूशन बापथ परमात्माहस क्षमा मंगान प्रार्थना कँरमुँच। अँकिस जायि छुनस वौँनमुत, ही भगवान, तोह्य

छिवुँ मन तुँ वॉनी निशि दूर। मगर म्य कॅर सिरिफ तुहुँज लीला, तुहंदि साकार रूपुक वर्णन। इसलिये अपराध कॅर्यूम क्षमा।

श्री रामकृष्ण—अवुँ ईश्वर छु साकार ति बेयि निराकार ति। तवुँ पतुँ छु साकार—निराकारुँ ति अपोर। तिमन ह्यकव नुँ बस यूतुय वॅनिथ। दुहकि त्रेयिमि पॅहरुँ छि बॅखुँत्य पंचवटी मंज कीर्तन करान। श्री रामकृष्ण ति छि तिमन सूँत्य मीलिथ गॉमुत्य। बॅखत्यन सूँत्य माजि हुंदि नावुक कीर्तन करान आनन्दस मंज मगन सपद्येमुँत्य।

साडुँ पाँछ या श्येँ बजे छु वखुँत। श्री रामकृष्ण छि बॅखत्यन सूँत्य पननि कमरुँ किस दखुँन-पूर वॉलिस ब्रांडस प्यठ बिहिथ। बॅखत्यन छि वुछान।

श्री रामकृष्ण (केदार बेतरि बॅखत्यन कुन)—युस समसार त्राँविथ त्याँगी मोहन्युव आसि सु ह्येँयि ईश्वरुँ सुन्द नाव। तस छनुँ बेयि कॅह काँमुँय। सु अगर ईश्वर सुंद ध्यान छु करान तुँ तथ मंज क्या तौजुब छु? सु अगर ईश्वरुँ सुँज फिकिर करि नुँ, अगर दयि सुँद नांव हेँयि नुँ, तुँ तेलि करन तस लूख नेन्द्या।

“समसॉरी मोहन्युव अगर दयि सुँद नाव जपि तुँ जाँनिव तस मंज छि बडुँ मर्दानुँगी वुछिव जनक राजु ओस बोड मरद। तिम आँस्य जुँ तलवारुँ चलावान, अख ज्ञानुँच तुँ ब्याख कर्मुच। अकि तरफुँ ओस पूरन ज्ञान तुँ बेयि अन्दुँ आँस्य समसारुँक्य करुँम करान। बदचलन ज्ञानाँ छेँ गरिचि सार्यय कामि बडुँ खूबी सान करान, मगर सोँ छि हमेशि पनुँनिस यारुँ सुँज फिकिर करान रोज्ञान।

“साधु संगुँच छि प्रथ विजि जोरूरथ। साद छि ईश्वरस सूँत्य मेलुँनावान।”

वारि वारि द्राय बॅखुँत्य गरुँकुन सारिवुँय कोर श्री रामकृष्णस साष्टांग दंडवत प्रणाम। भवनाथस वुछिथ वोन श्री रामकृष्णन, “चुँ मुँ गछ अज, त्वहि हिव्यन वुछिथुँय छि उद्दीपना सपदान।

भवनाथ छुनुँ वुनि समसॉरी सपुदमुत। वुमुँर आस्यख यिहाँय कुनवुह वुह। प्रोन, स्वन्दर शरीर। दयि सुन्द नाव बूजिथ छुस अँछन मंज ओंश यिवान। श्री रामकृष्ण छु तिमन साख्यात जन नारायन वुछान।

